

Urteko 29. Igandea (A)

LEHENENGO IRAKURGAIA

*Zirori eskutik heldurik eusten dizu,
nazioak zure menpean jartzeko.*

Isaiasen liburutik 45, 1. 4-6

Honela diotso Jaunak
Ziro erregeari,
berak aukeratu eta sagaratuari:

«Eskutik heldurik eusten dizut,
nazioak zure menpean jarri
eta erregeei soinetik
armak kentzeko,
zure aurrean hiri-ateak zabaltzeko,
guzti-guztiak zabaldu ere.

Israel neure zerbitzariaren onerako,
Jakob, neuk aukeraturiko
herriarengatik,
deitu zaitut zeure izenez
eta ohorezko eginkizuna ezarri,
ezagutzen ez nauzun arren.

Neu naiz Jauna, ez da besterik;
ez da ni beste jainkorik.

Aginpidez jantzi zaitut,
ezagutzen ez nauzun arren,
ekialdetik mendebaldera
jakin dezaten
ez dela inor ni besterik.

Neu naiz Jauna, ez da besterik.

Jaunak esana.

SALMOA

Salmoa 95, 1 y 3. 4-5. 7-8. 9-10a y e (R.: 7b)

R.

Goretsi Jaunaren ospea eta indarra.

Kanta Jaunari kantu berria,
kanta Jaunari, lurtar guztiok.

Zabaldu haren ospea atzerrietan,
haren mirariak herri guztietan! R.

Handia baita Jauna, guztiz goresgarria,
jainko guztien aldean beldurgarria.

Huts dira atzerritarren jainko guztiak;
Jaunak, ordea, zeruak egin ditu. R.

Goretsi Jauna, munduko herriok,
goretsi Jaunaren ospea eta indarra,
goretsi Jaunaren izen ospetsua!

Sartu haren aurrera eskaintzak eramanez. R.

Ikara zaitezte haren aurrean, lurtar guztiok!

Esan nazioen artean: «Errege da Jauna!

Sendo ezarri du mundua, ez du koloka egingo;
herriak zuzenbidez epaitzen ditu». R.

BIGARREN IRAKURGAIA

Gogora dakartzagu zuen sinesmena, zuen maitasuna eta zuen itxaropena.

San Paulo Apostoluak Tesalonikarrei egindako lehenengo gutunetik 1, 1-5b

Paulo, Silvano eta Timoteok, Jainko Aitarekin eta Jesu Kristo Jaunarekin bat eginik dagoen Tesalonikako eliz elkarteari idazten diogu. Grazia eta bakea zuei.

Eskerrak ematen dizkiogu beti Jainkoari zuek guztiongatik, gure otoitzetan gogoan zaituzteguna. Jainko gure Aitaren aurrean gogora dakartzagu etengabe zuen sinesmen ekintzailea, zuen maitasun saiatua eta Jesu Kristo gure Jaunarengan duzuen itxaropen iraunkorra.

Badakigu, senideok, Jainkoaren maiteok, berak aukeratu zaituztela. Izan ere, guk zuei hots egindako berri ona ez zitzaizuen hitz hutsez eman, Espiritu Santuaren indar beteaz baizik.

Jaunak esana.

Aleluia Flp 2, 15d. l6a

Aleluia, aleluia.

Izarrek munduan bezala egiten duzue argi,
bizia ematen duen mezuari tinko eutsiz. Alaluia.

EBANJELIOA

Eman, Zesarrena Zesarri eta Jainkoarena Jainkoari.

+ Jesu Kristoren Ebanjelioa San Mateoren liburutik 22, 15-21

Aldi haietan, fariseuek elkar hartu zuten, Jesusi galdera bat eginez tranpa jartzeko.

Beraz, ikasle batzuk bidali zizkieten, Herodesen alderdikoekin, galdetzeraz:

–Maisu, badakigu egiazale zarena eta Jainkoaren bidea behar bezala irakasten duzuna; inoren zeresanak ez dizu axolarik, ez baitiozu begiratzeko gizakiaren itxurari. Emaguzu, bada, zeure iritzia: zilegi al da Zesarri zerga ordaintzea, bai ala ez?

Haien maltzurkeria igarriz, Jesusek esan zien:

–Zergatik zatozkidate zirika, itxurazaleok?

Ea, erakutsi zerga-txanpona.

Haiek denario bat aurkeztu zioten. Jesusek galdetu zien:

–Norenak dira irudi eta izen hauek?

Erantzun zioten:

–Zesarrenak.

Jesusek, orduan:

–Eman, bada, Zesarrena Zesarri eta Jainkoarena Jainkoari.

Jaunak esana.

Blog: <https://homiliaspagola.blogspot.com/>